



Sud Bosne i Hercegovine
Суд Босне и Херцеговине

Broj: S1 3 Iž 044077 22 Iž
Sarajevo, 12.10.2022. godine

Sud Bosne i Hercegovine u Sarajevu, u apelacionom vijeću sastavljenom od sudija Zvezdane Antonović, predsjednika vijeća, Mirsade Džindo i Redžiba Begića, članova vijeća, odlučujući o žalbi političke stranke SDA-Stranka demokratske akcije, sa sjedištem u Sarajevu, ul. Mehmeda Spahe br. 14, koju zastupa generalni sekretar dr Halid Genjac, izjavljenoj protiv odluke Centralne izborne komisije Bosne i Hercegovine broj: 05-01-07-5-4081/22 od 27.09.2022. godine, o utvrđenoj odogovrnosti i novčanom kažnjavanju za kršenje odredbi Izbornog zakona BiH, na nejavnoj sjednici održanoj dan, 12.10.2022. godine, donio je

R J E Š E N J E

Žalba se odbija.

O b r a z l o Ź e n j e

Odlukom Centralne izborne komisije Bosne i Hercegovine broj i datum navedeni u uvodu, utvrđeno je da je politička stranka Savez nezavisnih socijaldemokrata – SNSD, s ciljem pogodovanja drugom političkom subjektu Stranka demokratske akcije-SDA, zloupotrijebila zakonsko pravo na učešće u radu biračkog odbora, čime je prekršila odredbu člana 7.3 stav 2. Izbornog zakona BiH, pa joj je na osnovu člana 6.7 stav 2 tačka 1) Izbornog zakona BiH i primjenom člana 19.9 stav (1) tačka 12) istog zakona izrečena novčana kazna od 4.000,00 KM.

Odlukom je utvrđeno da je politička partija Stranka demokratske akcije-SDA zloupotrijebila zakonsko pravo učešća u radu biračkog odbora, čime je prekršila odredbu člana 7.3 stav 2 Izbornog zakona BiH, pa joj je na osnovu člana 6.7 stav 2 Izbornog zakona i primjenom člana 19.9 stav (1) tačka 12) istog zakona izrečena novčana kazna od 4.000,00 KM.

Odlukom je utvrđeno da je Ademir Alibašić predsjednik biračkog odbora na biračkom mjestu 126A020 u Osnovnoj izbornoj jedinici Jablanica odgovoran što je zloupotrijebio zakonsko pravo učešća u radu biračkog odbora, čime je prekršio odredbu člana 7.3 stav 2 Izbornog zakona BiH, pa je na osnovu člana 6.7 stav 2 tačka 1) i 4) Izbornog zakona i primjenom člana 19.8 stav (2) istog zakona izrečena novčana kazna od 1.000,00 KM i zabrana imenovanja za rad u biračkim odborima, odnosno u organima nadležnim za provođenje izbora na 4 godine, od dana pravosnažnosti odluke.

Protiv ove odluke politička stranka SDA-Stranka demokratske akcije, blagovremeno je uložila žalbu u kojoj je navela da žalbu ulaže zbog pogrešno i nepotpuno utvrđenog činjeničnog stanja, pogrešne primjene materijalnog prava, povrede odredaba pravila izbornog postupka.

Podnositelj žalbe navodi da nije jasno na osnovu kojih dokaza i činjenica je Centralna izborna komisija BiH nesporno utvrdila odgovornost podnositelja žalbe, te da se radi o paušalnoj ocjeni, a ne ocjeni pravno valjanih dokaza. Navodi da donosilac odluke, odnosno Centralna izborna komisija BiH se poziva na odredbe Zakona o upravnom postupku, te da obrazloženje pobijane odluke ne sadrži jasno propisane dijelove, tj. obrazloženje je u suprotnosti sa dispozitivnom ožalbene odluke. Navodi da je podnositelj žalbe dostavio izjašnjenje u kojem je navedeno da je član biračkog odbora Ademir Alibašić bio u evidenciji članstva SDA do 07.09.2022. godine, ali da nije navedeno da je imenovan do tada bio aktivni član SDA. Navodi da se radi o licu koji duži vremenski period nije aktivni član, te da je odluka o isključenju imenovanog donesena 07.09.2022. godine, jer Opštinska organizacija SDA Jablanica nije mogla donositi odluke zbog dugotrajne bolesti predsjednika koji je bio jedini ovlašten da saziva sjednice organa. Navodi da je krajnje neozbiljno da se obrazloženje odluke zasniva na činjenici da je Ademir Alibašić u trenutku prihvatanja da bude Član biračkog odbora ispred političke stranke SNSD, bio član stranke SDA i dugogodišnji njihov član, te kandidat na Lokalnim izborima 2016. godine obzirom da je od 2016. godine do danas formirano na desetine stranaka koju sačinjavaju uglavnom bivši članovi SDA. Navodi da Centralna izborna komisija BiH nije dokazala da je bilo koji politički subjekt pogotovo SNSD pogodio političkoj stranci SDA, niti da takva činjenica postoji. Navodi da u obrazloženju ožalbene odluke da se odgovornost žalitelja zasniva na činjenici da su znali da je lice Ademir Alibašić predložen i imenovan kao član biračkog odbora ispred drugog političkog subjekta, dok još uvijek bio aktivni člana stranke SDA je prema navodi ma žalitelja neprihvatljiv i apsurdan.

U odgovoru na žalbu, Centralna izborna komisija Bosne i Hercegovine predložila je da Sud predmetnu žalbu odbije kao neosnovanu jer je ožalbena odluka donesena na pravilan i potpun način, na osnovu utvrđenja svih činjenica koje potvrđuju trgovinu biračkim mjestim, a koju CIK BiH treba da spriječi.

Žalba nije osnovana.

Prema stanju u spisu Centralna izborna komisija BiH je na osnovu podneska Koalicije za slobodne i poštene izbore „Pod lupom“ stekla saznanja o zloupotrebi zakonskog prava na učešće u radu biračkog odbora fiktivnim predstavljanjem, suprotno članu 7.3 stav 2 Izbornog zakona BiH. Ovaj podnesak je cijenjen kao inicijativa za pokretanje postupka po službenoj dužnosti u kome je zahtjevana informacija od Opštinske izborne komisije Jablanica, političkih subjekata Stranka demokratske akcije-SDA i Stranka nezavisnih socijaldemokrata- SNSD, te od Ademira Alibašića.

Na osnovu izjašnjenja i dostavljene dokumentacije Centralna izborna komisija BiH je zaključila da je politički subjekt SNSD, koji je imao pravo na člana biračkog odbora u Osnovnoj izbornoj jedinici Jablanica isključivo jer ima kandidata na najvišem nivou vlasti u BiH, za člana biračkog odbora predložio aktivnog člana druge političke partije i da ovaj način popunjavanja mjesta biračkih odbora predstavlja klasičnu trgovinu.

Opštinska izborna komisija Jablanica je dana 16.09.2022. godine, dostavila traženu dokumentaciju i to. Rješenje o imenovanju biračkog odbora za biračko mjesto JELAČICI-ZLATE-br.I26A020 od dana 26.08.2022. godine, u kojem je Ademir Alibašić imenovan za predsjednika navedenog biračkog odbora. Takođe, dostavila je i SG1 obrazac za navedeno lice u kojem stoji daje predložen ispred političkog subjekta Savez nezavisnih socijaldemokrata-SNSD.

Izjašnjenje je između ostalih dostavila i Stranka demokratske akcije-SDA dana 22.09.2022. godine u kojem navodi da je imenovan bio u evidenciji članstva SDA do 07.09.2022. godine, nakon čega su temeljem odredbi člana 21. i 22. Statuta SDA isključili imenovano lice iz

članstva SDA iz razloga koji su navedeni u Odluci nadležnog organa, odnosno Opštinskog odbora SDA Jablanica. Navode da je Opštinski izvršni odbor SDA Jablanica imajući u vidu odredbu člana 7.3 stav (2) Izbornog zakona BiH, kao i instrukciju koja je dostavljena iz sjedišta SDA, donio odluku kojom je isključio sve članove koji su prihvatili kandidaturu drugih političkih subjekata bilo kao kandidati ih članovi biračkih odbora, pa tako i Ademir Alibašića pod rednim brojem 17. u Članu II navedene Odluke. Iz tih razloga ističu da ne postoji odgovornost SDA za povredu navedenog člana Izbornog zakona BiH, te u prilogu dostavljaju Odluku o prestanku članstva u SDA broj: 155-1 /22 od dana 07.09.2022, godine.

Suprotno navodima podnosioca žalbe „da obrazloženje pobijane odluke ne sadrži jasno propisane dijelove, tj. obrazloženje je u suprotnosti sa dispozitivnom ožalbene odluke, te da se ne može utvrditi koje su to odlučujuće činjenice i na osnovu kojih dokaza je utvrđeno odgovornost podnosioca žalbe“, valja istaći da je Centralna izborna komisija BiH nesporno utvrdila između ostalih i odgovornost političke stranke SDA-Stranka demokratske akcije za kršenje odredbe člana 7.3 stav (2) Izbornog zakona Bosne i Hercegovine i to na osnovu čvrstih dokaza iz kojih jasno proizlazi da je i podnositelj žalbe zloupotrijebio zakonsko pravo na učešće u radu biračkog odbora na način da je Savez nezavisnih socijaldemokrata SNSD-Milorad Dodik predložio, a Opštinska izborna komisija Jablanica imenovala za predsjednika biračkog odbora lice Ademir Alibašića, a koji je u vrijeme podnošenja prijedloga za člana biračkog odbora i donošenja odluke o imenovanju za predsjednika biračkog odbora još uvijek bio aktivni član Stranke SDA- Stranka demokratske akcije.

U vezi navoda podnosioca žalbe „da je dostavljeno izjašnjenje u kojem je navedeno da je član biračkog odbora Ademir Alibašić bio u evidenciji članstva SDA do 07.09.2022. godine, ali da nije navedeno da je imenovani do tada bio aktivni član SDA, odnosno da se radi o licu koji duži vremenski period nije aktivni član,“ valja istaći, da su isti irelevantni, obzirom da Rješenje Opštinske izborne komisije Jablanica o imenovanju biračkih odbora za biračko mjesto Jelačići- Zlate-br.I26A020 broj:02-45-1427/22-R-20 doneseno dana, 26.08.2022. godine i isto je bilo dostupno između ostalih i podnosiocu žalbe, a izostanak reakcije, odnosno neprijavlivanje Centralnoj izbornoj komisiji BiH čini podnosioca žalbe odgovornim konkretnom slučaju. Naknadno donošenje Odluke o prestanku članstva u SDA broj: 155-1/22 dana 07.09.2022. godine dodatno dokazuje da se radi o trgovini biračkim odborima na način da jedan politički subjekt imenuje svoje aktivne članove ispred drugog političkog subjekta u konkretnom slučaju ispred političke stranke Savez nezavisnih socijaldemokrata-SNSD-Milorad Dodik i koji u izbornoj jedinici Jablanica prema dosadašnjim rezultatima nema jako biračko tijelo, da bi imao stvarni interes za imenovanjem svog člana biračkog odbora.

Dakle, u vrijeme podnošenju prijedlogu za članu biračkog odbora i donošenja odluke o imenovanju za predsjednika biračkog odbora Ademir Alibašić bio je član stranke SDA-Stranka demokratske akcije što potvrđuje Odluka broj: 155-1/22 od 07.09.2022. godine kojim je isključen iz članstva zbog imenovanja u birački odbor ispred druge političke stranke.

Navodi žalbe kojima se ističe da je krajnje neozbiljno da se obrazloženje odluke zasniva na činjenici da je Ademir Alibašić u trenutku prihvatanja da bude član biračkog odbora ispred političke stranke SNSD, bio član stranke SDA i dugogodišnji njihov član, te kandidat na Lokalnim izborima 2016. godine, obzirom da je od 2016. godine do danas formirano na desetine stranaka koju sačinjavaju uglavnom bivši članovi SDA valja istaći, da je Centralna izborna komisija BiH u obrazloženju ožalbene odluke kao nespornu činjenicu istakla i to da je lice Ademir Alibašić bio kandidat političke stranke SDA-Stranka demokratske akcije na Lokalnim izborima 2016. godine za Opštinsko vijeće Jablanica, a isključivu odgovornost podnosioca žalbe Centralna izborna komisija BiH zasniva na činjenici daje podnosiocu žalbe bilo poznato da je lice Ademir Alibašić predložen i imenovan kao član biračkog odbora u osnovnoj izbornoj jedinici Jablanica, ispred drugog političkog subjekta, dok je još uvijek bio

njihov aktivni član, a isto nisu prijavljeno Centralnoj izbnoj komisiji BiH.

Samu visinu izrečene kazne ovo vijeće nije preispitalo, iz razloga što odluka u ovom dijelu nije bila ni pobijana žalbom.

Obzirom na navedeno, po ocjeni ovog vijeća, pobijana Odluka Centralne izborne komisije BiH je pravilna i zakonita, a žalba neosnovana, pa je istu, primjenom odredaba člana 81. stav 1. Zakona o upravnim sporovima Bosne i Hercegovine (Službeni glasnik BiH, broj 19/02, 88/07, 83/08 i 74/10), valjalo odbiti.

PREDSJEDNIK VIJEĆA
S U D I J A

Zvezdana Antonović